

牧

齋

初

學

集

牧齋初學集卷九十五

外制五

吏部稽勳清吏司主事周順昌授承
德郎

勅曰昔人之舉郎吏曰真素寡欲萬物不能移
也官人之職如鏡於水澄汰自己辨論有原稱
是選者不亦難乎具官周順昌介圭不飾朱絃
有音肅然清廟之容雅有先民之度自其筮仕
司理壹意守官風清閩海之塵氣憚貂璫之魄
蔚爲民譽晉陟天曹體望滋章師言惟允靖獨

自矢寅協奉公破藩籬厓岸之私虛能鑒物絕
弓効苞苴之間廉非市名蓋將以裴王崔毛爲
心非直著簡要清通之望乃以覃恩授具階於
戲余欲拔貞固而斥華僞汝明余欲進公忠而
抑阿黨汝翼以平心考覈人地以實用儲侍人
才雖在郎吏余將以統均望爾爾其念哉

妻吳氏封安人

勅曰君子砥節首公能以清彊自奮殆必有寢
門之助焉具官某妻封孺人某氏淑慎無儀安
貞有節適舅姑之所溫清無間於夏冬竭奉養

之勞洗腆更兼手藥物迨相夫於典劇益相誓
以御窮衣有弊穿允稱齷鹽之淡泊奮無粉澤
彌資水鏡之清明茲加封爲安人臣有義曰無
私交女有心曰無私謁斯所謂相成者乎尚益
毖勤以竟厥德

父可賢先贈文林郎福建福州府推
官加贈承恩郎吏部稽勳清吏司主

事

勅曰賢才之出殆非偶然元氣孕畜於家門而
楨幹克生於王國詩有之教訓爾子式穀似之

式穀之云豈以辟咡提誨爲能事與贈具官某乃具官某之父蘊義生風誠心爲質立身於名教之內祖義而本仁行已在儒俠之間重氣而輕死枕藉數卷吾伊於菽水之餘揮斥千金兀傲於蓬蒿之下是生喆嗣爲我清郎抵掌而談節烈之風鬚眉如在奮身以柱傾邪之俗風骨有傳是用加贈具階官於戲鶴之在陰寧知其子之和燕之有翼寧非厥考之詒爾無悔壽後之勤朕益懋開先之報

母張氏加贈安人

勅曰江左之士柔靡輕心鮮有感槩砥節者非
獨士氣使然亦其鉛華浮曼之習中於胚胎而
內教不立之故也贈孺人某氏乃具官某之母
茂矩有聞樸心不改事尊章於遲暮黽勉齋鹽
安君子於遠游躬親操作是生賢子不愧母儀
如彼靜姬却丹華而不御迨於膾仕終自貢以
爲貞茲加贈爲安人於戲爾子爲清吏爲清郎
而爾爲母師爲內則豈獨可以易吳風朕將以
此教天下焉

吏部文選清吏司員外郎張振秀授

奉直大夫

勅曰唐制有言官有秩清而選妙者其選曹員外郎之謂乎頃者官方不壹吏議弘多官無一定之衡人有踐更之選稱是任者蓋尤難之具官某風規凝遠器縕閑深畿南之惠政流聞駕部之能聲茂著乃因民譽晉陟銓曹朗鑑在心虛舟應物銓敘之格已熟澄汰之途一清乃在旬月之間適當選人之闕如茅之拔幾遍於丘園積薪之流半登於啓事大破累年之留滯用昭新政之清惠朕心用嘉師言惟允乃以覃恩

則如子如傷不愛膚髮治亂國則以禽以雞罔
俾子遺觀其捨攘而又安咸以笑談而御變應
奇才異能之薦獨邁等夷緣隨牒平進之嘗再
遷郎署職司會計少試其足國之能優游度支
徐養其濟時之用乃以覃恩授具階於戲遇槃
根而加利夫豈擇官投利刃而皆虛貴乎藏器
惟深沉可以厲其氣惟閱歷可以老其材益勉
自修以需不次欽哉

父體認先贈文林郎河南河南府陝
州靈寶縣知縣加贈承德郎戶部廣

西清吏司主事

勅曰古者崇獎卓行厥有四葉表宅六闕旌門
世教下衰往往湮沒無稱而卒以發聞於後余
庸表而著之亦以佐功令之未逮也贈具官某
乃具官某之父粹和成性篤實飛聲文史蔚爲
珪璋德行仰其牆垣倚廬三載時有薑桂之滋
孺慕終身不解蓼莪之痛敬敏任恤嗣踵阨以
睦里鄰孝友睦姻族墳墓以聯兄弟箴銘徧於
牖戶言動具有典型矢心以毋自欺不愧衾影
教子以彊爲善聿有箕裘誠可繼於先民允有

傳於後嗣是用贈具階官於戲劉氏之七業子能襲其餘休韋家之一經爾已醻其素志庶可徵資庭之訓終當著惇史之書

戶部江西清吏司員外郎廉第授奉

直大夫

制曰乃者軍興浩煩度支匱乏戶部諸曹郎欽助大司農咨嗟仰屋共襄國計朕思得公忠廉辨之臣歎歷中外者錯置于部其選甚不輕也具官某材器含弘訏謨經遠爲令以循良播澤廷誅以詳慎流恩積有年勞擢居民部以努絲

辦理之才當賦算告窮之日精心握算佐輓輸
一時之窮蒿目持籌爲儲備百年之計體望滋
茂勞勸有聞乃以覃恩授具階朕今命爾出守
河閒近在三輔征繕未已捐瘠滋多爾之字人
可以庶爾之祥刑可以教爾之司計可以富無
衣五袴之謠豈遂遜於前烈乎爾其懋勤佇我
後命

父司書醫官贈文林郎大理寺右寺
右寺副加贈奉直大夫戶部江西清
吏司員外郎

制曰傳曰上醫醫國其次疾人皆醫官也士有抱道不試居身方伎之中比於古之醫官者與其有以發聞於後余得表而著之累贈具官某乃具官某之父博喻爲師東修自好慨有大志恥爲小儒濟世於疴瘵之時自命以岐摯之業學究原本能通三世之書澤及婺愽有活千人之德再世而顯天不吾欺在昔倉公之善醫止於有女而韓康之賣藥僅以藏名豈若斯人蔚有譽問是用贈具階官服余書命傳之史家庶幾療國之有人可曰良醫而無後

戶部福建清吏司員外郎鄒嘉生授

奉直大夫

制曰頃以贍軍之故大司農率其屬日夜持籌仰屋而偷懦營私者猶蝗食鼠耗其閒良可憂也其有公忠廉辨之士不憚桔据司我管鑰勤勞茂著余寵嘉之爾具官某材器含弘許謨經遠飛華廷對展采地曹以止水不波之心爲棼絲必理之計指畫飛輓徵輸之事憂切軍儲勾稽秬黍龠合之間勤逾家計儲備之經費有紀倉廩之耗蠹一清韻頑歲年籍甚聲聽乃以覃

恩授具階朕今命爾出守西安唐大曆中長安
溉田大減於漢今視唐又何如爾在戶曹留心
國計轉漕通渭成跡具在興二渠之利復陸海
之穰以佐我國計朕佇觀爾所以治秦也欽哉

禮部祠祭清吏司郎中賈允元授奉

政大夫

制曰祠祭之官舊矣它曹治事祠部治神非通
幽明窮掌故不在茲選矧朕初卽位祀事孔多
夙夜明禋其曷敢後具官某風操端直志緼清
和奉使節則咨諷有聞典屬國而贈勞無失蔚

爲民譽晉陟祠郎諳曉舊儀參酌故事寢園筵
几依然弓劍之思黝堊掃除邈矣祖宗之格執
事有恪顧吾建禮之禋曹夙夜惟寅稱此冰廳
之清選遂以覃恩授具階朕方祇承宗祀懷柔
百神率循祧廟之儀嗣舉橋山之禮近以綏孝
子而假 皇考遠以寧風旱而彌裁兵惟爾毖
祀之能用致我將之頌欽哉

父應德先贈奉直大夫禮部主客清
吏司員外郎加贈奉政大夫禮部祠
祭清吏司郎中

制曰爲吾志義之臣風操端永者必其先有以
開之無基不可以厚墉肯構必始於作室理之
嘗也贈具官某乃具官某之父行無考類學有
本原辨志離經多士推爲祭酒禔躬善物與人
如飲醇醪惜哉有志而無時允矣居今而稽古
焚書逸禮若口授於坐隅矩行規言儼心思於
函丈是用贈具階官於乎賈逵悉傳父業人咸
徵家學之傳鄭衆再世儒門天亦厚遺經之報
母盧氏仍前封

制曰小雅不作而白華之詩廢也朕深念之蓋

不獨潔白之孝子不可得見而今妻壽母亦爲
斯世所希有此豈非盛世之憂與累封太宜人
某氏乃具官某之母淑慎禔身安貞應節少習
公宮之教長嫻賓祭之儀閔長寢於九京逝者
不作籌短檠於五夜遺孤有聞式看日月之輝
光彌見風霜之高秀鯢齒未艾受介福於北堂
鸞誥方迴貞寵章於南閣茲仍封爲太宜人雕
軒文駟蔚爲一世之觀便殿肩輿茂著六宮之

法

禮部主客清吏司主事虞德隆授承

德郎

勅曰朕丕承 祖宗之今緒方貢充庭旅百雜
實每臨軒燕勞懷來遠人顧念春官之屬爲吾
典司客曹者其有人焉具官某韜玉渾涵斷金
通敏始流徽於劇邑旋握鑑於留曹事有賢聲
擒於客部克勤職業諳曉舊章正小賓小客之
儀修其禮物辨五年比年之貢差其途迎贊我
秩宗典司屬國敷國恩厚僉曰汝能乃以覃恩
授具階頃者東夷不共闕我職貢咸謂以尺箋
鞭之耳然招携懷遠古有明訓誠使方夏丕平

異俗內面而吾以象胥坐制之不亦休乎尚益勤毖以副予綏柔之意欽哉

妻蔣氏封安人

勅曰朕讀羔羊退食之詩蓋不惟其大夫之節儉正直表著於燕居而家人肅穆之風亦可以想見焉具官某妻封孺人某氏凶貞辨族作配名家指彤管以相規惟茲靜女却丹華而不御彼美淑姬相爾令人休有華問素紗簡淡與綦組而相安粉署蕭閒喜清寒之互映茲加封爲安人服斯寵命勵彼素風無忘夙夜之勤彌表

靖共之德

父一道先贈文林郎山東青州府安丘縣知縣加贈承德郎禮部主客清吏司主事

勅曰昔我成祖綏靜國難治用重典時則有若理卿謙以平亭明允持法兩朝盛德之後必復其始今其子孫又以遺德發聞予寵嘉之贈具官某乃具官某之父世德作求家風綿邈內行淳備譬桃李之不言積善有餘業岐黃而濟物蔚有令聞施於後人蓋廷尉之門陰德久徵

於舊閥而比干之策祥刑茂著於後昆信哉天
不吾欺是以世濟其美是用加贈具階官於戲
無念爾祖著累朝忠厚之貽益大而家食先世
熾昌之報

母楊氏加贈安人

勅曰先王之制禮也報必有先田之祭先嗇也
川之祭先河也皆報其先也今吾臣子推恩必
先嫡母蓋亦以著教焉贈孺人某氏乃具官某
之嫡母動繇內則懋踐閭彝汲水著爲婦之勤
宵火勵相夫之志宛其死矣何以報之幸哉有

予以起家乃得從夫而分爵於戲梧棬已矣誰興執器之悲圖像依然尚想過庭之拜義豈殊於毛裏恩必始於本原茲加贈爲安人使知報必有先而衆著於崇本之敎豈獨慰夫逝者而已

繼嫡母任氏加贈安人

勅曰詩人稱后妃之德必以樛木逮下爲賢而公子之仁厚從而應焉和氣致祥亦理之恒也封太孺人某氏乃具官某之繼嫡母性資惠明儀法閒肅敬爾夫子婉焉琴瑟之和燮彼諸姬

居然姊姒之好莫辨所出忻緩帶以相從逾於
已生勤辟咡而爲教聿成子德克念母勤樹護
之慶已章宿草之恩載渥茲加贈爲安人惟此
鴈鳩之德壹以爲儀用知麟趾之仁終焉未艾

生母張氏贈安人

勅曰生母之有服也自高皇帝之著孝慈錄
始也旣有服矣而厭於尊格於制而不得以推
恩人子之情猶闕如也今吾卽位需恩施及三
母不惟念所生者可以無憾抑亦可以仰副
高皇帝之德意於戲休哉某氏乃具官某之生

母有小星之德有育子之閔爾子爲令報最馳
恩二嫡而獨不得以逮爾實命不猶豈非詩人
之所歎嗟矣乎今乃以霈恩及爾矣於戲愴鼓
鐘於長樂我有同悲追顧復於裏毛爾無餘憾
非此恩波之委地誰無涕淚於終天茲特贈爲
安人嵬其有知尚克享此

兵部職方清吏司主事徐日久授承
德郎

勅曰頃者狡夷未平王師在野議者率以謂將
帥數易則無以振軍聲擇將不精則不可圖勝

算欲得知兵謀國之士錯置職方以參預帷幄
之寄中茲選者蓋難其人具官某器縕開明風
規簡直兩爲邑今廉辨有聞中更浮沉志氣不
撓擢於起部再歷夏曹當羽書旁午之時兼戎
事頽弛之日才猷日老揮斥於槃根閨歷之餘
儲待滋深兼綜夫衿要阨塞之故師薦惟允受
事方新乃以覃恩授具階於戲用兵如用藥以
療病爲成功擇將如擇醫以知人爲能事知兵
而後可與謀國知將而後可與知兵此朕所以
拊髀而歎也爾其勉之朕將以遼事畀汝

兵部職方清吏司主事王弘祖授承
德郎

勅曰頃者禁旅單虛衛卒墮弛勾稽澄汰言者
日以上聞而未有行也朕深念之安得公忠彊
直十數輩參錯郎署中爲吾舉綜核之效乎具
官某介圭不飾精金能割初以發硎之刃試理
開封平亭閣實案無遺牘賢聲籍甚乃陟兵曹
當樞庭填委職掌廢弛之日慨然修舉不辟嫌
怨稽京營積年之額覈班軍累歲之餉凡籍伍
符之必計而一粒一鍍之不遺今茲之事蓋爾

之有緒言而未竟者也若爾者可謂之公忠彊
直之臣矣茲以覃恩授具階夫官之有分曹猶
農耕之有畔無相越也爾覈汰留餘盡歸大倉
不越兵事而陰有裨於計部惟其不越是以有
裨夫不越之爲裨也大矣爾所舉僅有其緒引
而竟之天下事可以尺幅盡也爾其懋哉

刑部浙江清吏司主事陸化熙授承
德郎

勅曰詩稱淑問如臯陶而漢通儒皆爲律令章
句刑獄之事固儒者之所盡心也朕卽位以來

哀矜庶戮惟良折獄日屢於懷具官某擢秀名
儒起家法署當圜土填咽之日兼法律破析之
時麗附罔察請比毛舉而爾傳之經術致其忠
愛諸所平反冤獄閱實疑罪參報待以削草象
魏用爲縣書惟明克允時論翕然乃以覃恩授
具階夫自 皇祖末年以至於今刑法亦多故
也然而可信者律也不敢者法也本經術以參
法令此明刑弼教之本而爾之所有事也爾其
毖哉朕不以文法吏蔽汝

妻夏氏贈安人

勅曰士之有賢耦猶君之有勞臣也推勸勞之意以施於臣故其閨門相貳死生契闊之故人主之愍卹及焉具官某妻某氏儀法夙嫻儉共自勵艱耕出汲辛勤於十指之中糲食穿衣顛賴於數行之側迨相夫於筮仕終約已而食貧一命未沾溢先朝露良足愍矣茲特贈爲安人於戲布素度身生不御冠帔之貴御窮沒齒死猶勤旨蓄之思我有寵章慰其永逝庶幾幽壤尚服享之

母陳氏贈安人

勅曰朕念長樂之慈愴不及養顧瞻兩宮潛然
出涕發號施恩凡臣子之有母而不逮養養而
不逮顯者皆與被焉不惟彝典宜然亦所以信
吾悲也某氏乃具官某之母慈庭媲美內則有
聞鬻子辛勤不間蹀躞之負操家龜勉備嘗荼
蕡之艱迨爾子旣接跡承明而爾猶沒身荆布
不已悲乎今且以覃恩及爾矣於戲覩蓼蕭自
葉之澤良慰我心顧蘭陔白華之養莫非人子
存者不匱往者有知凡吾所以霈恩臣下者蓋
亦因吾母以及人母而使天下知我念母之無

已也爾知之乎

刑部河南清吏司主事王良臣授承
德郎

勅曰在昔人主享國百年度作刑以詰四方猶
曰朕言多懼朕敬于刑矧余方嗣服受王嘉師
惟良折獄其敢不毖慎具官某易直子諒恭敬
溫文擢穎甲科流徽宰邑回翔壁水晉陟秋曹
爾以豈第之心兼之閑實之久老於情法無毛
舉它比之文致其哀矜有明刑聚教之閔副我
欽恤良深歎嘉遂以覃恩授具階乃者刑罰不

裏出入時有丹書錯互奏駁紛如朕甚患之書
不云乎用其義刑義殺勿庸以次汝封今之斷
獄者容亦有次焉者乎爾尚益懋簡孚必卽天
論母以世輕世重爲解也朕則顯陟汝

父維城原任漢中府通判贈承德郎
刑部河南清吏司主事

勅曰朕聞世祿之家鮮克繇禮而積德之報不
於其身士承家繼後能使譜牒不替耕獲有人
斯可以爲賢矣原任具官某乃具官某之父世
德聯綿內行淳備孝乎惟孝家巢反飼之烏友

必因心庭榮交讓之木旣俛首風塵之吏益矢
心清白之遺蔚彼去思尸祝在漢岷之際蕭然
歸計風流居廉讓之間稼獵一經紹青箱於有
永箕裘再世載白石以相傳人稱別駕之功代
叶海邦之慶是用贈具階官天已錫祥刑之策
人咸瞻道德之門

母趙氏贈孺人

趙故文毅公用賢之女

勅曰詩咏于以采蘋必曰公侯之事以其夙嫺公
宮之訓而儀則有聞也我有直臣是生淑女風
流綿邈詒於後人朕將表著之以昭彤管某氏

乃具官某之母圖頌被躬珩璜比德洽世家饋
祀之則故壺儀克肩習我君剛直之風故鉛華
不御孝睦移於姻黨廉法著於家門不及事姑
未艾陳衣之痛願然有子終如屬纊之期悵宿
莽之方滋蔚蘭蓀之競茁栢棬已矣永言內則
之芳華簪笏依然尚想外家之風烈茲特贈爲
孺人肆姪賢於再世宜媲美於千秋

刑部山東清吏司主事李自華授承
德郎

勅曰朕聞哀敬折獄惟良折獄故伯夷以降典

折民而董生用春秋決獄朕哀矜庶戮期協於
中將博求迪哲之人以副我清問之意具官某
行可標準言成文章起家循良休有譽處効能
輦轂踐更劇煩敘擢刑曹職司奏讞以廉平之
德兼明允之才欽乃攸司傳以經術期於惟刑
之恤庶幾俾獄無留乃以覃恩授具階乃者刑
罰不中出入時有要辭錯亂幾無成獄書不云
乎惟齊非齊有倫有要惟倫與要折獄之本也
爾爲法吏朕以迪哲望爾爾其敬哉

父可守原任貴州都司清平衛儒學

教授贈承德郎刑部山東清吏司主事

勅曰蜀自漢以來代著文學文翁五經之教益州樂職之詩弘長風流於今爲烈今吾儒碩趾美前修有子克家顯聞於世余庸表而著之具官某乃具官某之父舍章挺生躋躋秀發強學博喻富有英華矩行規言動應古昔遂應明經之辟出爲鼓篋之師歸休乎環堵之宮遺予以一經之業摩娑青簡恍疑晤對於丹鉉敬慎丹書尚念收威於複楚遺經不朽至德可師是用

贈具階官於戲有位於瞽宗應厥彝典爲觀於
石室視我贊書

工部都水清吏司主事金元嘉授承
德郎

勅曰司空諸曹郎惟水衡有河渠之役銜命而
出掌隄防畚鍤之事以分理行河之政而漕運
賴焉非中外數歷夙有能聲者不在茲選具官
某擢穎制科流徽宰邑師廉平爲治之績急吏
緩民循沉實守正之風隨牒平進休有民譽著
於工曹司庫藏而鈐鍵惟嚴筦出內而棼絲必

理人地相稱人皆知水部之名出入均勞我是
有河漕之寄乃以覃恩授具階夫呂梁之渠閘
肇自平江命爾以中河爲界畫地而守爲漕政
計至殷也今東方侵梗運道戒嚴以治河寓治
兵卽以治兵兼治河斯平江之績舉矣爾無以
水曹戒越俎也朕則顯陟汝

大理寺右寺右寺副廉第授儒林郎
勅曰棘寺之設以審讞秋曹辟臺之獄其在厥
屬有炤駁番異之條參覆疑異以聽於其長非
清彊公恕積有譽望者不在茲選具官某秉心

惟允執德不回出宰疲人入報上考敍遷北寺
俾副右評豈弟有餘明習滋久平亭疑案爲之
涉筆而思訊駁爰書不以得情爲喜副我欽恤
良用歎嘉乃以覃恩授具階頃者法律破析橋
遏滋多白簡喧呶與丹書相下上書不云乎明
啓刑書胥占以刑書爲衡而胥占以權之豈惟
閱實要辭亦可以稽柱國論此棘寺之責也爾
懋勉哉朕將顯陟汝

大理寺右寺評事任國楨授文林郎
勅曰廷尉天下之平也故其屬以評爲名士非

盤桓久次老於情法居是官也欲其虛明詳慎
一底於平難矣具官某文學世家高華妙選服
官民部以清慎得名稱職度支以綜核取咎回
翔閒散流滯歲時爰自上林次於佐棘困衡旣
久求聽彌精致忠愛於罷民得情勿喜麗輕重
於疑獄有革乃孚小大以情文法無害乃以覃
恩授具階頃者吏議弘多獄辭寃比皆以失平
之故爾亦嘗涉筆而思之乎記不云乎凡制五
刑必卽天論天平之極也爾以此評刑朕亦以
此評爾敬之哉

大理寺左寺左寺副曹文衡授儒林郎

勅曰國家於棘寺之官陳殷置輔不厭詳複至有卿貳正副之設凡以正刑書而重民命也苟非吉士豈可以稱此意哉具官某起爲國器副我廷平閒者棘寺空虛圜土填咽攝官承乏夙夜勤勞寢興狴犴之間飲食爰書之內爲民請命數上封章求補司刑以清滯獄數囹圄之困苦如在目前陳法令之敝利至於流涕雖九閭之請未克以動天而五聽之辭已孚於捨地朕

卽位以來哀矜庶獄省視故牘得爾所上書惻然歎傷有緩刑泣罪之思焉茲以覃恩授具階書不云乎蠻夷猾夏寇賊姦軌女作士爾鄉所上章論之詳矣今東隅未靖姦利交跡是朕好生之德未洽而爾之言猶信也淑問如臯陶朕深有望於爾爾其念哉

母旌表節婦常氏贈安人

勅曰國家表宅之典放於成周所以勸節也推恩之制放於唐宋所以教孝也陰教衰數風微寂寥我有明綸光於幽穸旌表節婦某氏乃具

官某之母佩玉德以作婦操冰心而相夫迨所
天捐棄之時正厥子孤孩之日旌心斷髮矢皓
首於盛年顧影寒燈襲白晝爲長夜乳汁枯於
襁褓血與漚俱髮膚瘁於家門淚隨聲下哺養
六尺如鴻脫而雛成促赴九京譬蛾成而蠶死
蘭儀永謝栢操有聞下報先君故知含笑而入
地願然有子載聞申命之自天旋觀日月之昭
回彌見風霜之凜冽茲特贈爲安人於乎有膳
有拜業已接跡於汗青來游來觀尚亦回心於
圬自信千秋爲不偶雖百世其可知

中書舍人曹師稷授文林郎

勅曰中書省之屬掌詔勅璽書冊命之事以重
王命有事殿陛與起居載筆之臣夾立左右其
榮近爲何如哉具官某箕裘綿邈器局高凝起
自南宮升於西掖入參侍奉出掌絲綸進止有
章溫共不改譬之有聲之玉嘗應於佩環而無
纈之珠獨宜於掌握禁近之臣朕所顧視年勞
已著彌用歎嘉乃以覃恩授具階國家以秘省
儲臺諫之選使之靜諳舊章而閒習世務也問
樹而不言焚草以自晦盤桓久次而無所建明

亦或有出於此者乎官近地清優游養望此爾
今日之事而非朕之所以毗爾也爾其念哉

戶部廣西清吏司主事李孔度授承

德郎

勅曰朕瞻顧艱難博求弘濟蓋嘗追懷先正思
譽聞於九京選建才賢庶箕裘於前烈譬之喬
木古者世臣誰其似之吾有人矣具官某乃原
任太子太保刑部尚書楨之子舊德深醇家風
綿邈慨有大志可謂似其先人傑然羣才遂能
出乎世類歷官所至皆有賢聲乃以僕丞遷於

民部職司會計搜剔蠹餘軍儲自供積弊盡掃
至其奉使遼左指顧河東畫地爲圖聚關城於
尺幅握奇決勝籌夷虜於目前憂國有人匡時
惟允乃以覃恩授具階於乎唐雅不云乎惟西
平有子惟我有臣爾先人昭事我祖公望歸然
爾尚仗我多難無忘先烈繼公忠盛大之業蔚
爲寶臣在君臣父子之間庶幾盛事

妻杜氏仍前封

杜故大將軍松之女

勑曰史稱天水北地高上氣力歌謠慷慨風流
猶存而婦人亦閔其君子其詩曰在其板屋蓋

亦有修我甲兵與子偕行之志焉今吾霈恩郎
吏及其室家博訪風謠激揚志義未嘗不攬秦
風而太息也其官某妻某氏歸於甲門出自將
種風範肅穆饋摯交賀於閨門姿性剛明刀劍
錯立於侍婢相爾夫子宜其室家闢狄之錫有
加素沙之德不替茲仍封爲安人嗚呼將殞大
星感風霜而痛父郎光列宿勉夙夜以戒夫義
同於羽林之孤禮當有石窮之子父子夫婦之
間採秦風者將及焉爾其敬哉

刑部貴州清吏司郎中張光奎授奉

政大夫

制曰朕惟人才之難養之有素培之奕世用之累朝故古之元老世臣之家必有承休濟美之士此亦國運所繫而非獨家風使然也具官某乃原任戶部右侍郎兼都察院右僉都御史養蒙之子教成胄子家擅素風帷幕有聲西曹籍甚祇承家法諳曉舊章致其忠愛之心傳以經術之學朕以爲文法之吏安所取此蓋庶幾不踐不履有公子仁厚之風而惟明克尤得臯陶淑問之教者歟茲以覃恩授具階惟乃烈考以

忠貞正直事我 皇祖名在國史稱爲勞臣今爾可謂世其家矣於乎不忘舊人則有先朝弓効之感作求世德則有故家喬木之思覃恩及爾朕蓋深有槩於中矣爾知之乎其有以稱

太僕寺寺丞郭夢詹授承德郎

勅曰書稱僕臣正厥后克正太僕丞貳古爲奉車之官非家法肅明稚有風操不在茲選具官某乃原任戶部左侍郎贈都察院右都御史謚恭定諱惟賢之子藹然儒風蔚有家訓遂以胄子試於奉嘗夙夜在公朝夕有恪積著年闇乃

擢是官當孟春焚牧之時正軍興選騎之日種
屯皆爲宿弊印炮徒屬虛名惟爾之能思舉厥
職乃以覃恩授具階惟乃父事我神祖歷官
三臺懋著勞勸爾尚克念先烈無以日月叙遷
爲能事詩不云乎秉心塞淵駿牝三千爾馬官
也余故以秉心戒爾欽哉

妻俞氏封孺人

勑曰古之世家必有賢女令妻蓋其珩璜琚瑀
之防箴圖阿保之訓積習使然也余有寵命昭
于管彤具官某妻封孺人某氏武襄之子恭定

之婦恭大慈小具有儀法相夫鬻子不替勤勞今爾夫能于其官漸致通顯則爾之爲女爲婦可謂克舉矣茲加封爲安人惟武襄累戰立勳誓死報國朕恒拊髀思之爾服習遺教尚有以勸勉其夫石鄉之封朕不後爾

都察院炤磨所炤磨朱大輓授廸功郎

勅曰周之詩曰無曰予小子召公是似古之人主勸誘其世臣若家人父子之相告語也矧有恩而不下逮朕何忍焉具官某乃東閣大學士

兼禮部尚書國祚之子蔭藉高華被服儒素爰以任子躋于臺幕勾稽故牘職司僻藏勞于其官執事有恪世祿繇禮朕有嘉焉乃以覃恩授具階惟我先帝舊學于乃父以乃父詒輔余冲人爾尚鈍心屏慮以佽舊德晨昏之助有賴于爾夫退食休沐下車里門澣衣子舍此清朝之美談而非子弟之細事也敬之哉勿替朕命

太僕寺寺丞黃正賓授承德郎

勅曰昔我先帝未正東朝諫諍滋煩訶譴相逮今山陵已畢遺老日登而仗節死諫之臣若

晨星之在望追懷舊事良用愴然其有甄陞可無書命具官某風規開敏才地清華當禁廷給事之時正儲位殷憂之日黃扉定策尚低廻集苑之歌丹地輸忠乃參預伏蒲之諫騰綸闈之削藁斜封宣播于朝堂先瑣闈以露章祕閣流傳爲掌故肆三朝之鼎革起廿載之沉淪濺血猶新重荷全生之德攀髯莫逮彌深徇主之恩擢爾僕丞斯爲不次乃以覃恩授具階於戲銅龍邈矣忍誇張羽翼于先朝金馬依然尚砥礪桑榆于末路惟端謹可以養節惟廉靜可以保

名益勉素心用章休命欽哉

妻孫氏贈安人

勅曰夫婦之誼比于賓友死生契闊詩人悲之
况乃節義相期艱難與共而中道棄捐者乎具
官某妻某氏圖頌叶矩賓祭有齊當抗章拜杖
之時厲闔門從死之志吁其悲矣命之不猶睠
茲白首以還朝尚想青衿而去國風雨如晦長
懷雞鳴儆戒之時日月光華不見翟茀以朝之
盛茲特贈爲安人服此休命慰爾幽塗

父國聘贈承德郎太僕寺寺丞

勅曰司徒鄉三物之教胥春秋月吉而從事焉
今吾臣工追命先世膺以發揮潛德弘長流風
雖出典膏亦應邦法黃某乃具官某之父風姿
樸茂器縕純明孝友睦婣不待族師之戒敬敏
任恤無愧閭胥之書蘊義氣以生風每存亡而
生死操仁心以爲質匪剛柔而競綵宜有餘休
及于厥子是用贈具階官於乎奮身抗節爾旣
伸負劍之規揭德振華余亦重繙衣之好

母王氏贈安人

勅曰朕褒旌節孝廣樹風聲凡有命辭必先勸

厲今吾臣子聿有母師風教有聞儀節茂著余
庸表德著之冊書某氏乃具官某之母婦道可
宗女圖母越毀容斷髮矢盛年以殉夫送往事
居閔餘生而教子訓誠攸著風節有聞迨乎漏
澤于賜環久已纏悲于執器嗚呼母儀邈矣永
懷風樹之淒涼臣節凜然彌想冰霜之高潔茲
特贈爲安人惟吾愍罔代彼漆書烏頭雙闕之
褒生有格于功令彤管千秋之懿終當著于頌

圖

文華殿中書房辦事大理寺右寺右

卷之三
寺副 汪鑣授儒林郎

勅曰簪筆之臣供奉左右歲月叙遷于國家之大計無與也具官某起家儒術給事禁庭夙夜在公溫恭有恪乃者遼左警急饋運艱難慷慨上書輸金助餉夫毀家紓國大臣之有事急病讓夷君子之所貴爾能如是豈不難哉國家之于爾也旣寵之以清銜昭之以綽楔矣茲又以覃恩授其階夫卜式願輸家之半助邊公孫弘以謂宜勿許朕之寵嘉爾者蓋亦國典宜爾而非尊顯以風百姓之意也爾其敬哉

妻程氏封安人

勅曰爲吾禁近之臣溫恭朝夕必有賢明之助焉况其卓犖好義者乎其官某妻某氏機杼服勤澣濯昭儉使爾夫齊其躬以守官肥其家以輸國則惟爾之能特封爲安人不惟從夫之爵蓋亦有勸勞之義焉

父道斐贈儒林郎文華殿中書房辦事大理寺右寺右寺副

勅曰資於事父以事君而敬同故志義之臣必本諸父汪某乃具官某之父馴行孝謹被服儒

素慷慨好施百里誦德今爾子可謂有父風矣
嗚呼恥獨爲君子斯固爾之心也願俱死匈奴
豈獨子之志與是用贈具階官爾其有知當爲
默舉

母趙氏封太安人

勅曰能食能教母慈之大也立身顯親子道之
終也某氏乃具官某之母操作治家式穀訓子
觀其子之珥筆內庭而知其有畫荻之教觀其
子之輸產絕塞而知其有恤緯之忠特封爲太
安人於戲匪惟爾之褒以詔人母

牧齋初學集卷第九十五

牧齋初學集卷第九十六

外制六

南京吏部右侍郎顧起元授通議大夫

制曰朕運撫大來助求小毖瞻惟舊德式念先
猷其有高帝豐芑之遺兩朝侍從之選表儀
卿貳體望具瞻者朕方夢卜求之而恩命豈有
愛焉具官某才挺天人學知今古射策名成於
寡二臨軒象近於魁三蔚有良史之才置之禁
近歸然師儒之教貳我成均久列桂坊載臨璧

水儲端漸陟爰立有聞迨余訪落之初乃有留
銓之命留務清簡允宜如水之心銓事低昂小
試若金之用廻翔滋久雅望在人乃以覃恩授
具階於戲非堯舜不譚有體必期于有用以社
稷爲說迂身乃所以善君尚念國步之艱危保
余冲子母曰留曹之清峻可以優賢爾無忘共
濟之思余將有卽真之拜

妻王氏加贈淑人

制曰人臣飛華夷路擢秀清塗必有佽助之賢
以當賓友之誼疏榮旣逮愍冊宜先具官某妻

封恭人某氏橐修告虔濯慨奉職本烏衣之著
姓儀法有聞佐青蘭之名儒機絲無閒寃其死
矣何以報之翟茀以朝嗟溘先于朝露彤管有
煒美代後于辰猷茲加贈爲淑人蘭儀默贊于
金夫蕙問永光乎石窮

祖雷先贈中憲大夫湖廣襄陽府知
府加贈通議大夫南京吏部右侍郎
制曰國之元氣將鍾美于賢才家有樸心先鬱
蒸爲至德畜無不發報必有初先贈具官某乃
具官某之祖父太樸不雕仁心爲質以孝弟而

秉任恤不言而躬行自保受以及救賓無心於
望報宜而孫子爲吾寶臣達屢繡裳煥然有事
于家廟純衣應杖優焉如見其祖先是用加贈
具階官爾能積慶于詒孫余用遡源于率祖

祖母劉氏加贈淑人

制曰詩稱詒謀厥孫易言受福王母蓋合中外
百年之鬱積以培國家一代之人才非夫有穀
之詒曷有流根之澤累贈恭人某氏乃具官某
之祖母孝思維則淑慎無儀如生民之厥初時
維草昧肆承家之伊始作其壺彝珩璜被躬茂

矩流傳于奕世機絲比德深仁累積于百年茲
加贈爲淑人服茲忝畀之榮允叶棟隆之吉

父國輔原任湖廣寶慶府知府贈通
議大夫南京吏部右侍郎

制曰朕聞黃河之水源可濫觴泰山之雲起自
膚寸凡創業爲可繼蓋有開而必先原任具官
某乃具官某之父風韞純明器資魁傑以南國
之彥早踐通班以西曹之賢出守名郡惟明克
允仁孚園土之中既威且懷澤流湖嶺之際軟
濱流之水載廉石以傳家演邵陽之書比瀛金

而詒子徵循良之傳于國史父作之子述之啓
公輔之望于邦家我有臣爾有子是用贈具階
官於戲播徽猷於竹帛佇我白麻責寵命于松
楸慰茲黃壤

母王氏加贈淑人

制曰凡吾聞望之臣必有賢明之母自家所以
刑國本立而後道生風徽有遺式穀不爽封恭
人某氏乃具官某之母敬共內德佇肩壹儀簾
閣相夫佐平反于丹筆繫燈廸子徵掌故于青
箱媿德有聞媛賢競爽炳丹青于經史殷勤辭

叩之規指樞軸於機絲肅穆絃綻之訓茲加贈
爲淑人於戲版輿已遠悵陪京雒涘之游銀管
如新嗣韓國瀧岡之表

南京通政司通政使林學曾授正議

大夫

制曰昔我 神祖久道作人凡其梓漆之材皆
我儀刑之老踐更禁近布列兩都顧瞻周行蔚
爲盛事朕于恩命豈有愛焉具官某德稟粹和
器涵莊重言行以先民爲法問學稱君子之儒
爰自理官登于銓部清素寡欲進爲郎吏之標

淡白端莊退守丘園之責栖遲一紀羽儀滋章
偃蹇再遷踏道彌固迨余初服始列清卿夙夜
在公信無慙于舊德衣冠有異恍或疑其古人
惟納言之職官稱爲司命而留務之清峻可以
優賢我有老成往司出納乃以覃恩授具階於
戲惟我新朝其忍遐棄先朝之耆老令此舊國
亦得瞻望先民之典刑清廟之求助不遑黃髮
之詢諮敢後尚其彊飯佇我徵車

妻陳氏仍前贈

制曰人臣委質奉公白首一節其于閨門相貳

死生契闊之際人主必閔然念之非徒以卹其私亦以崇報也具官某妻贈淑人某氏靜穎成性柔嫋爲儀酒醴芼羹侍奉必爛于內則鍼縷刀尺相助尤歟于入官雖不永年厥有令聞中道捐棄終不替黃髮之期早歲勤勤遂永贊素絲之節茲仍贈爲淑人用以昭婦順之報不獨慰夫子之心

繼妻吳氏仍前封

制曰人臣束髮厲行老而彌固則必有賢明之助焉朝廷之有寵章亦所以區明風烈爲世表

也具官某繼室某氏儀度閒肅性資惠明宦成
不染于紛華家食彌微其靜好一生麤糲仰窮
何異于糟糠十載丘園晤對恍疑其賓友終相
夫子爲我名卿翟茀以朝不改素沙之德縞綦
相樂益堅白首之心茲仍封爲淑人尚永垂列
女之名且默贊二南之化

祖文明先贈太常寺卿加贈正議大夫
南京通政司通政使

制曰國家崇重真儒原本正學瞽宗之祀僅有
其人至有經明行修湛思道術鬱積于躬而發

聞于後者又于彝典之中著章表焉贈具官某乃具官某之祖父古有立德今爲碩儒矩行規言動應先民之法度窮理盡性學究易道之高深以人師而爲經師流風邈矣能善世而兼遜世遺書蔑如迨其子能傳其緒言而厥孫益大其絕學摩娑青簡神明煥發于百年俛仰丹鉉晤對恍存于一室天旣厚儒行之報人益徵家學之傳是用贈具階官於戲文獻有徵箕裘未艾明德顯于三世固當爲壹行之光遺經著于再傳用以附儒林之傳

祖母陳氏仍前贈

制曰道德博聞之儒修身遜世而又有賢明之
妃以作之合天將鍾美于是其再世而興也不
亦宜乎贈淑人某氏乃具官某之祖母懿質夙
成德門作配總笄櫛紵侍奉一循于內儀箴圖
珮環被服不異乎儒者盛年不永再世其昌律
呂位同終取和聲之應山澤氣合是徵生物之
祥觀孫子之駿發滋長信天道之挹注匪偶茲
仍贈爲淑人益衍雲仍之祚永言蒸畀之休

繼祖母蘇氏仍前贈

制曰家道暨必始于婦人况繼室乎以賢繼賢和氣叶應受茲介福及于再世余有追命其何愛焉贈淑人某氏乃具官某之繼祖母天性鍾慈女圖茂矩攸德內助若琴瑟之雖和媲美前修譬珪璋之判合字其子則德叶鳴鳩啓其孫則卜徵鸞鳳翔休徵之藩發于再世信協氣之感聚于一人茲仍贈爲淑人於乎禮垂如母之文永爲徽範詩頌翼孫之美叶彼休徵

父敦忠原任福建興化府儒學教授
先贈太常寺卿加贈正議大夫南京

通政司通政使

制曰國家方聞篤行之臣巋然羽儀者其淵源
家學有開必先朕固將表而出之非徒崇報而
已原任具官贈具官某乃具官某之父言無疵
悔行應衡規孝友可質于神明學問必根乎閭
雒三臨講席歸休乎環堵之宮屢絕韋編畢世
于訓詁之業肥遜離俗洗心謝末世之風塵厲
行束修禔躬爲僞學之箴砭惟而令子爲吾寶
臣丹鈴一經箋笥不忘乎家學白首一節風期
有繼于前人象賢有徵燕翼未艾是用贈具階

官於乎匪徒命德且以表微生爲人師旣有聞
于鼓鑼沒祭于社終有位于瞽宗

母柯氏仍前贍

制曰有蹈道之儒則必有媿德之配潛德弗耀
亮于婦孺而卒以其子顯聞豈不休哉累封淑
人某氏乃具官某之母稟性安貞束身祇肅奉
尊章于上食佐夫子于下帷分半席之青氊蕭
然燈火守一宮于環堵永以晤言有此素風成
其賢子羔羊之節咏其素絲多露之防嚴于白
首臣節茂矣母儀徵焉茲仍贍爲淑人於乎生

未播其徽華歿乃留其儀範淑靈不昧尚克享之

南京光祿寺卿管少卿事史弼授中大夫

制曰朕克典神天奉先思孝洪惟我高皇帝

寢園原廟咸在留都歲時薦羞皇敢弗毖慎簡明德以薦馨香祿臣司光吾有人矣具官某鎮密若玉端直如弦自擢西臺以登冏寺奏議多聞于削藁政績必期于可書進退盤桓不難久次出入諷議有補本朝晉秩祿卿蔽自朕志往

司留寺非獨優賢蓋爾以廉辨肅括之才而本
諸明允篤誠之德酒醴菹醢以潔以時上食膳
羞必誠必敬自此寢廟之薦饋致告苾芬行見
高廟之衣冠出游顧享乃以覃恩授具階於
戲朕觀掌故南北光祿職掌不同尤以羈乘輿
供養爲能南以丘陵廟薦裸爲職爾熟諳故事
必能其官爾其佽右饗于我將余敢忘詒謀于
豐芑爾往欽哉

妻李氏加封淑人

制曰君有公忠之臣夫有貞順之配其勤勞于

國與相助于家也人主其有以念之矣其官某妻累封恭人某氏知讓知戒有肅有慈居恒不替于專勤躬親春割既貴不忘夫教戒身服領圖并日鹽鹽在官何異于家食中宵宿火教子尤勤于相夫遂成女士之名允爲母師之範茲加封爲淑人屢衣白屨見命服之有光文駟雕軒知福祉其未艾

父洪達原任山西平陽府解州儒學學正先贈中憲大夫太僕寺少卿加贈中大夫南京光祿寺卿

制曰古者鄉里壹行之士必有崇臺綽楔之褒
朕廣樹風聲旁求懿德以疏榮追命之典寓闡
幽表微之思雖出舊章亦應古法原任具官贈
具官某乃具官某之父介圭不飾璞玉有光孝
敬溫文少無子弟之過簡默靜退長爲君子之
儒丹鉛獨抱夫遺經青紫不移其素志入學鼓
篋諸生嚴頌禮于登堂彈琴讀書家人狎詠歌
於環堵肆我名卿光於家訓守青氊之故物無
忝所生奉白貢之上爻以永終譽緇衣有託黃
壤如生是用加贈具階官於乎國有彝章蓋以

示先河之報鄉之子弟尚亦勤瞽宗之思

母吳氏加贈淑人

制曰古之賢達必有母師故公忠廉直之臣必不產於冶容逸樂之母家人婦子之閒風氣積習而家教從之可不慎與累贈恭人某氏乃具官某之母克全四行慎守七章賤綺穀之蠹女紅躬紡績以移日惡華丹之亂窈窕服綦縞以終身儉爲德共不替寢門之教繪居素後嘗餘裙布之風惟此令人守其善訓寡言正色奉陝輸輕脫之規夙夜在公稟貞靜清閑之德茲加

贈爲淑人於乎漢曹昭之誠子恐辱清朝曾敬
姜之教家恒憂下位風徽可繼圖頌具存尚無
忘典訓之儀庶益茂珩璜之矩

祖鍾華贈中大夫南京光祿寺卿

制曰朕聞人才之生必有根本源流弘長敎義
有傳是以卿士之風猷咸稱祖考之詒穀本諸
家史著之冊書史某乃具官某之祖父淵如有
容粹然特達赴公家之難能急病而讓夷卹昆
弟之貧每絕甘而分少躬爲長者之行飲人以
和晚多達生之言佚我以老身既隱矣爲善何

意于近名德莫大焉節身乃用以昌後餘其善慶詒爾孫謀試觀世德之蟬連益見祖風之綿邈是用贈具階官於乎美其所稱論譏何慙于銘鼎沒而不朽典祀將著于瞽宗

祖母蔣氏贈淑人

制曰敬姜不云乎君子能勞後世有繼古之女宗所以詒謀而垂戒者如此其至也能勞之報百世未艾而况于再世乎某氏乃具官某之祖母歲圖被躬橐修循禮辛勤十指潔酒食以供祭賓龜勉一生勤辟績以先媼御子姓憚其嚴

恪家人化其專勤是以保姆之規終老而不懈
先姑之戒易世而彌敦宜爾聞孫受茲介福茲
特贈爲淑人嗚呼惟茲恩命著爾壺儀不惟爲
女史之光尚有助寢門之教

南京光祿寺少卿馮若愚授奉政大夫

制曰我皇祖久道化成人物蔚起凡今中外
具瞻之彥卒多萬曆培養之人至於淹抑回翔
盤桓久次老其梓漆之材留爲子孫之用於今
爲盛朕有賴焉具官馮若愚玉潤而栗絃直以

端西曹執法於平反南國流聲於出守屬稅貂
剥膚之日揩彼吽牙值侵虎擇肉之時柱其血
吻縛廝徒於襄水填塞濁流投養子于漢池蠲
除宿垢是以中人肆其謠諑馴致聖主亦爲
嘆咨治郡九年薦章數上堂堂題柱姓名久署
於屏風累累積薪陞轉終淹於啓事歸田園者
十載教子姓以六經蒿目憂時有似羊公之流
涕閒居念舊宛如杜預之沈碑惟衰榮之有嘗
見風雨之不改聿求舊德爰陟留卿勾稽原廟
之膳羞綜覈寢園之饋享衣冠有異想風烈於

先朝俎豆惟新凜冰霜於夙夜乃以覃恩授具
階書不云乎人惟求舊爾之在今日猶大廈之
有巨木而清廟之有雅音也重之以祖考之
詒固將儲峙於帷下優之以留務之簡豈云留
滯於周南爾勿謂白首而見招余將惟黃髮之
是詢爾往欽哉

妻顧氏贈宜人

制曰國有元妃卿有內子艱難相助恒嗟咨草
昧之初笄潤死生每愴歎芳塵之後我求懿德
著之策書具官某妻累封恭人某氏體順爲心

光緒甲子年
路和成性辛勤相讀膏火夜宿於寒窓黽勉佐
廉突煙朝冷於官舍順能鍾物和以致祥謝氏
之芝蘭羅生堂祀王家之龍虎競奮戶庭雖大
命之不遐而徽猷之如在頌高秀之行以爲國
爵屏貴家爵忘貧述孝友之風則曰衣無嘗主
見無嘗父顧此家風之綿邈皆繇儀法之深長
矧新恩錫類之辰正舊德升華之日茲加贈爲
宜人於乎拜像而泣知珥貂之有人可頌而圖
洵管彤之不朽

繼妻姚氏贈宜人

制曰朕追慕原陵永懷長樂訪問掖廷椒房之
故事感嘆曾參王駿之隆言當需恩之時於吾
臣下室家新故之際未嘗不悽愴睠顧而重以
書命也具官某繼妻某氏禮必叶中言無出閭
鵲巢比德相夫益勉於晨昏鳩養一心鬻子無
閒于毛裏於茲漏澤念彼窮泉固云誼重於遺
簪亦曰愛深於織屨螟蛉有子閨門聿著其恩
勤麟鳳多才邦家猶藉其長養茲特贈爲宜人
於乎繼賢明之範百年均湛露之恩廣慈孝之
風千古釋履霜之痛

父季兆原任工部司務贈中憲大夫

湖廣襄陽府知府加贈奉政大夫南

京光祿寺少卿

制曰祭必有先禮當數祖考世家之閥閭袁不如揚徵世德之淵源卿猶慙長名教必錄於積習而光輝亦漸以發聞原任具官贈具官某乃具官某之父學擅菁華行兼圭璧橫經講學則雲集生徒筮仕傍工則霜清郎署休有譽駢簪無枝求歸休乎一畝之宮自命以千秋之業籌燈簾閣息游有似乎飲水分少絕甘推解不忘

乎舉火奉九言於太叔守以終身放三省於子
與歿而得正居然白貢以廉讓爲箕裘蔚矣丹
鈴用詩書爲簪笏是用贈具階官於乎家有譜
牒發祥必遡于濫觴國有彝章揭德可符於汗
簡

母錢氏加贈宜人

制曰蓼蕭之澤自葉以及根望祀之誠先河而
後海故家頌賢明之母則國稱志義之臣不有
推崇何言報稱累封太恭人某氏乃具官某之
母發揮婦道標表母儀宜爾室宜爾家儀範茂

傳於九族相其夫相其子光華蔚起于一門迨
乎卿月之流暉已見婺星之掩彩雕軒文駟追
銅鞮就養之時風樹寒泉遡石窮開封之後罷
社之痛有節累茵之悲何窮爲歌念母之詩彌
深陟屺之歎茲加贈爲宜人於乎慶鍾燕翼象
已感於台階祥發羽儀光先賁於堂斧余將有
事於申命爾其無憾於下泉

南京浙江道監察御史曹汝蘭授文

林郎

制曰國家妙選臺諫南北竝置豐鎬重地賴執

憲之臣以彈治之其風采論議猶在吾轂下也
推恩之典其可後乎具官某風簡詳密藻思清
華奮跡賢科爲政渡邑撫江陽交會之地字巴
渝凋瘵之民濟陟留臺彌深宿望上章保護拳
拳禁闈之思荷橐遄行凜凜陪京之寄朕嘉乃
志樂觀厥成茲以覃恩授具階於平奉 高帝
之衣冠則當厪對揚之慮覽江山之形勝則當
思鎖鑰之艱凡吾所望于爾者固不徒飛章傳
遽稱諫臣之選而已也爾其懋哉勿替朕命

妻丁氏仍前封

勅曰人臣出宰遐邦入司雄職固國之勞人也不有賢婦以相其內欲壹心營職不已難乎具官某妻封孺人某氏勤爲柔範言著禮經攻苦力相夫下帷御窮不變于謙仕夜行多畏用知交儆之心辰告有章數屢如何之間茲仍封爲孺人服茲翟茀之章益茂管彤之德

父馳周贈文林郎四川重慶府江津縣知縣加贈南京浙江道監察御史仍前階

勅曰人之餘休如木之垂陰爲吾志義之臣蔚

起休問亦其先之德陰有以詒之也贈具官某乃具官某之父少有大志長實素心誦德誦聲自喜爲節俠之行依忠依孝安得此長者之言種德不見其逢年市義乃徵于易世宜而哲胤作我寶臣是用贈具階官於戲有子克家聿著堂皇之美厥考作室尚思塗既之勤

母李氏仍前贈

勅曰食而能教式穀所以成名養不逮親枯樞由之永慕贈孺人李氏乃具官某之母淵懿可度柔嘉有章事夫篤疾之餘訓子童蒙之日蘭

儀奄沒蕙問彌新簪筆生風尚想指陳于畫荻
憂心如醉徒懷手澤於丸能茲仍贈爲孺人哀
此風木之悲用霈蓼蕭之澤

南京江西道監察御史陳必謙授文
林郎

勅曰御史執憲轂下紀綱國體其在留臺耳目
之寄稍遠而彈肅之任彌專自非風力肅明夙
爲民譽何以中吾茲選乎具官陳必謙行修而
志堅器弘而識定廉辨勵節有毀家紓國之思
勞勸服官以勤恤民隱爲事踐更劇縣擢寘留

臺誠結于中義形于色人中屈軼京國爲之聳
觀柱後惠文奸回于焉屏跡不俟陽城七年之
久已占魏徵百奏之陳古稱真諫臣吾有望焉
乃以覃恩授具階於乎我 高帝寢園原廟咸
在舊都豐水鎬京厥有遺烈爾思忠思孝儼若
顧瞻之紀之綱訪求故實斯所以稱職者大而
裨余者弘矣爾往欽哉

妻錢氏仍前封

勅曰爲吾臺憲之臣正色歛容而風裁茂著非
獨其束修自好也家人婦子之間亦必能相貳

以有成矣朕深嘆之具官某妻封孺人某氏孝
敬有齊儉勤無斁鳴環司饋匡卒業于三餘服
縞從官贊素風于五緘用能使凜然風裁恒警
戒于畏行矯矯霜稜不摧殘于交謫膳此乘馳
之節居然弋鴈之規茲仍封爲孺人再承珈副
之榮益懋珩璜之範

父希堯先贈文林郎河南衛輝府輝
縣知縣加贈南京江西道御史仍前
階

勅曰士之精神才術不獲試于身則必有以顯

聞于後土之膏也必發川之壅也必決挹彼注
茲天道使然也贈具官某乃具官某之父器資
魁壘性行深淳孝友于家退而修長者之行節
俠自喜進不干鄉曲之名聚散千金生產不介
乎目睫俛仰一室世務恒列乎鬚眉宜爾後人
繼其大志高吾門今容駟馬已叶再世之占度
其旁可置萬家庶慰九京之願是用贈具階官
於戲可垂可繼是誠在于人謀爾熾爾昌尚亦
觀乎天咫

母張氏仍前封

勅曰傳不云乎培塿無松栢朕之諫臣有居正秉義風彩著聞者所謂非積習名教不至此者也娠賢育德母師之功其可誣哉封太孺人某氏乃具官某之母德備孝慈性成淑慎練裙帷布偕隱德于逸人苦膳寒灰佐義方而教子是成廉吏作我臺臣素節高寒有華丹不御之志東修刻勵有機絲警戒之風儀範滋章徽華茂著茲仍封爲太孺人黃髮鯢齒知福履之永綏文駟雕軒洵往來之有煒

河南衛輝府輝縣知縣陳必謙前母

錢氏贈孺人

勅曰朕發號霈恩爲吾臣子輟蘭陔之思釋桎
捲之痛者可謂至矣其有生不獲事沒不獲封
情有所窮禮無可考而亦得以與被焉者於乎
此亦仁之至義之盡矣某氏乃具官某之前母
出於忠孝之門躬有共儉之德殫十指以起家
瘁一身而作苦經營草昧奄忽盛年墓木已拱
陳根不哭豈意四十餘年之久責爾幽穸者乃
在所不知之人乎又豈意夫情無節而禮有制
考課不能得而覃恩得之乎於乎崇報有初蓋

取先河之義發祥有自必問濫觴之源因母以
念母嗟長樂之鼓鐘同悲靜夜因親以及親使
海隅之枯木咸被春風茲特贈爲孺人寃兮享
之可以爲慰

南京四川道監察御史萬言揚授文
林郎

勅曰朕讀前史至皇祐宣諭御史必用忠厚純
直通世務明治體之人未嘗不三復斯言也閒
者遴選臺諫錯置南北妙簡循良皆用此意具
官某才華拔傑器識沉深拔穎賢書分符淵水

乃膺師薦擢寘留臺材猷滋深節槩日老昌言
抗疏期于木直而從繩奮志觸邪俄已陰消而
見覲南國仰巡行之跡舊京傳且止之謠乃以
覃恩授具階於戲以中朝選建之憲臣居留臺
風紀之要地肅雖櫓笏可以對越 高廟之神
靈慷慨乘驄可以坐制長江之要害朕固將居
近而御遠爾勿謂重北而輕南佞性飛章啓余
逖聽爾往欽哉